



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 24. Pravilnika o godišnjim finansijskim izvještajima političkih stranaka (“Službeni glasnik BiH” broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2011. GODINU GRAĐANSKE DEMOKRATSKE STRANKE BiH

Broj: 03-07-6-387/12
Sarajevo, 12. mart 2013. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE	9

MIŠLJENJE REVIZORA

Služba za reviziju finansiranja političkih stranaka izvršila je reviziju godišnjeg finansijskog izvještaja Građanske demokratske stranke BiH za 2011. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama tada važećeg Zakona o finansiranju političkih stranaka ("Službeni glasnik BiH" broj: 22/00, 102/09 i 54/10)¹ i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Građanska demokratska stranke BiH u izvještajnom periodu nije postupila u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Građanska demokratska stranke BiH u 2011. godini postupala u skladu sa odredbama Zakona o finansiranju političkih stranaka.

¹ Dana 05.12.2012. godine stupio je na snagu novi Zakon o finansiranju političkih stranaka ("Službeni glasnik BiH" broj 95/12)

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Građanske demokratske stranke BiH za 2011. godinu.

Revizija je preduzeta u skladu sa članom 10. stav (1) Zakona o finansiranju političkih stranaka („Službeni glasnik BiH“ broj: 95/12), članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2011. godinu Građanska demokratska stranke BiH je iskazala prihod u iznosu od 43.836,75 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	29,00	0,07 %
2	Prilozi fizičkih lica	21.770,00	49,66 %
3	Prilozi pravnih lica	0,00	0,00%
4	Prihodi od imovine	7.200,00	16,42 %
5	Prihodi od pr.lica	0,00	0,00 %
6	Prihodi od poklona	0,00	0,00 %
7	Prihodi iz budžeta	14.837,75	33,85 %
	Ukupni prihodi:	43.836,75	100,00 %

Prema podacima iz godišnjeg finansijskog izvještaja, Građanska demokratska stranke BiH je ostvarila rashode u iznosu od 53.792,99 KM.

2. PREDSTAVLJANJE POLITIČKE STRANKE

Naziv političke stranke: Građanska demokratska stranke BiH. Skraćeni naziv stranke je GDS BiH.

Stranka je registrovana 20.07.1990. godine kod Višeg Suda u Sarajevu i u sudski registar upisana Rješenjem broj: R-I-7/02, veza Rješenje broj: R-I-14.

Sjedište političke stranke je u Sarajevu, ulica Titova 9a.

Lica ovlaštena za zastupanje političke stranke su: Ibrahim Spahić, predsjednik stranke, Anton Štitić, dopredsjednik stranke, Nusret Čaušević, sekretar stranke i Ahmed Halilović, direktor.

Lice ovlašteno za podnošenje finansijskih izvještaja za 2011. godinu je Ahmed Halilović.

Prema podacima iz godišnjeg finansijskog izvještaja za 2011. godinu, organizacionu strukturu Građanske demokratske stranke BiH čine:

- Glavni odbor,
- 3 Kantonalna vijeća i
- 15 općinskih odbora.

3. OPIS REVIZIJE

Predmet revizije je godišnji finansijski izvještaj Građanske demokratske stranke BiH za 2011. godinu i to sljedeći organizacioni dijelovi:

- Glavni odbor Građanske demokratske stranke BiH Sarajevo,
- Općinski odbor Građanske demokratske stranke BiH Hadžići,
- Općinski odbor Građanske demokratske stranke BiH Srebrenik i
- Općinski odbor Građanske demokratske stranke BiH Doboj Istok.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Građanska demokratska stranka BiH u izvještajnom periodu postupala u skladu sa odredbama tada važećeg Zakona o finansiranju političkih stranaka („Službeni glasnik BiH“ broj: 22/00, 102/09 i 54/10)² - u daljem tekstu Zakona o finansiranju.

Obim revizije finansijskih izvještaja Građanske demokratske stranke BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica, prihode od imovine u vlasništvu političke stranke i prihode iz budžeta.

4. PRETHODNE KONTROLE I REVIZIJE

Služba za reviziju finansiranja političkih stranaka kontinuirano je obavljala reviziju i pregled finansijskih izvještaja Građanske demokratske stranke BiH u periodu od 2004. do 2010. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci da treba postupati u skladu sa odredbama člana 3. stav (4), člana 6., člana 8. stav (1) i člana 11. stav (1), (3) i (4) Zakona o finansiranju.

Nakon izvršenog pregleda godišnjeg finansijskog izvještaja za 2010. godinu, izdat je izvještaj o pregledu sa nalazima revizije i preporukom stranci da treba postupati u skladu sa odredbom člana 8. stav (1) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2011. godinu, utvrđeno je da Građanska demokratska stranka BiH nije ispoštovala ranije date preporuke revizije.

5. NALAZI I PREPORUKE

5.1. NALAZI

a) Građanska demokratska stranka BiH nije ispoštovala odredbe člana 8. stav (1) Zakona o finansiranju političkih stranaka.³

² Zakon o finansiranju političkih stranaka („Službeni glasnik BiH“ broj: 22/00, 102/09 i 54/10) je bio na snazi do 04.12.2012. godine

³ U skladu sa odredbom iz člana 8. stav (1) Zakona o finansiranju, državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

Organizacioni dio političke stranke u Mostaru je tokom 2011. godine, poslovne prostorije površine 8,82 m² u vlasništvu Grada Mostara koristio bez naknade.

Na osnovu Odluke o načinu i postupku davanja u zakup poslovnih prostora Grada Mostara, broj: 01-02-5/11 od 08.02.2011. godine, cijena zakupa poslovnih prostora na području Grada Mostara, za drugu kategoriju, iznosi 8,00 KM/m². U skladu sa navedenom Odlukom, cijena zakupa poslovnog prostora koji je dodijeljen Građanskoj demokratskoj stranci BiH, u 2011. godinu bi iznosila 846,72 KM, koliko iznosi i zabranjeni prilog koji je ostvarila ova politička stranka.

b) Građanska demokratska stranka BiH nije ispoštovala odredbe člana 11. stav (1) i (3) Zakona o finansiranju političkih stranaka⁴.

U poslovnim knjigama Građanska demokratska stranka BiH nije uspostavila adekvatne i potpune evidencije o prihodima, rashodima i obavezama političke stranke i finansijski izvještaj koji je podnijela Centralnoj izbornoj komisiji BiH, nije popunila u skladu sa Pravilnikom o godišnjim finansijskim izvještajima političkih stranaka.

- (1) U finansijskom izvještaju Građanska demokratska stranka BiH nije iskazala priloge tri fizička lica, odnosno vijećnika ove političke stranke u Općinskom vijeću Doboj Istok, u iznosu od 1.853,18 KM.

Politička stranka je u finansijskom izvještaju sredstva u iznosu od 4.565,00 KM, koja su joj isplaćena sa transakcijskog računa Općine Doboj Istok iskazala kao prihod iz budžeta, iako su u okviru pomenutog iznosa sadržani prilogi fizičkih lica u iznosu od 1.853,18 KM⁵, dok prihod stranke iz budžeta iznosi 2.712,00 KM.

Neiskazivanjem priloga fizičkih lica Građanska demokratska stranka BiH je prekršila odredbe člana 14. Pravilnika o godišnjim finansijskim izvještajima političkih stranaka, dok je pogrešnim iskazivanjem prihoda iz budžeta prekršila odredbe člana 19. pomenutog Pravilnika.

- (2) Općinski odbor Građanske demokratske stranka BiH Hadžići nije uspostavio evidencije o svojim troškovima i blagajničkom poslovanju, odnosno o gotovinskom prometu sredstava. Na osnovu dokumentacije, prikupljene od Glavnog odbora političke stranke utvrđeno da su troškovi ovog organizacionog dijela, koji su isključivo plaćani gotovim novcem, u finansijskom izvještaju netačno iskazani.

- Uvidom u izvode sa transakcijskog računa, ovog organizacionog dijela stranke, utvrđeno je da su sredstva u ukupnom iznosu od 6.540,00 KM sa transakcijskog računa podignuta gotovinski i prenesena na blagajnu, iz koje je stranka izvršila gotovinske isplate, a pri tome nije uspostavila blagajničke evidencije.

⁴ Prema odredbi člana 11. stav (1) Zakona o finansiranju, stranka je obavezna uspostaviti potpune i tačne evidencije o svojim prihodima i rashodima.

Prema odredbama člana 11. stav (3) Zakona o finansiranju, stranka je obavezna podnositi finansijski izvještaj u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06)

⁵ Na zahtjev Centralne izborne komisije BiH, Općina Doboj Istok je dostavila akt, broj: 03-14-1134/12 od 04.12.2012. godine, u kome navodi da je Građanskoj demokratskoj stranci BiH u 2011. godini isplaćivala sredstva na osnovu izjave vijećnika (Banjć Sejfo, Hodžić Izet i Škrebo Maksida) o davanju donacije stranci u visini od 10% paušala.

- U okviru troškova Općinskog odbora Građanske demokratske stranka BiH Hadžići, koji su u finansijskom izvještaju iskazani u iznosu od 6.711,49 KM, pogrešno su iskazani troškovi stipendija u iznosu od 3.600,00 KM, dok su troškovi naknada predsjedniku Općinskog odbora iskazani u manjem iznosu, odnosno u iznosu isplaćene naknade od 2.400,00 KM, bez troškova pripadajućih poreza i doprinosa na pomenuta sredstva.

Uvidom u dokumentaciju, utvrđeno je da je v.d. predsjednik Općinskog odbora Građanske demokratske stranka BiH Hadžići, Ramiz Čović, 22.04.2011. godine donio Odluku, broj: 01-05/11, na osnovu koje će se isplatiti sredstva za troškove reprezentacije, telefona i održavanja u iznosu od 3.040,00 KM, tako što će sredstva za troškove reprezentacije u iznosu od 2.400,00 KM biti isplaćena predsjedniku Općinskog odbora Građanske demokratske stranka BiH Hadžići, dok se način plaćanja preostalog dijela troškova u iznosu od 640,00 KM ne navodi u odluci.

Također, predsjednik Općinskog odbora Građanske demokratske stranka BiH Hadžići, je 20.10.2011. godine donio Odluku, broj: 01-35/11, prema kojoj će ovaj organizacioni dio stranke stipendirati tri studenta u školskoj 2011/2012 godini, pri čemu će stipendija iznositi po 1.200,00 KM po svakom studentu pojedinačno.

Politička stranka je izvršila isplatu novčanih sredstava fizičkom licu, predsjedniku Općinskog odbora Građanske demokratske stranka BiH Hadžići, u iznosu od 2.400,00 KM, a pri tome, obzirom da ta sredstva imaju karakter ličnih primanja, nije obračunala, niti je uplatila, a također nije ni u finansijskom izvještaju iskazala troškove po osnovu poreza i doprinosa u skladu sa poreznim propisima⁶.

Obzirom da je politička stranka sredstva, u svrhu plaćanja troškova političke stranke, isplatila osobi koja nije uposlenik stranke i to gotovinski, u skladu sa poreznim propisima, bila je obavezna obračunati i platiti porez na dohodak i pripadajući doprinos u skladu sa Zakonom o porezu na dohodak.

U finansijskom izvještaju, politička stranka je iskazala troškove u ukupnom iznosu odobrenih stipendija za školsku 2011/2012 godinu, odnosno iznosu od 3.600,00 KM. Pored toga što je u 2011. godini iskazala i troškove stipendija u iznosu od 2.400,00 KM, koji se odnose na narednu, odnosno 2012. godinu, politička stranka ne raspolaže sa dokumentacijom o izvršenim isplatama stipendija. Također, u skladu sa važećom praksom i poreznim propisima⁷, politička stranka je stipendije trebala isplaćivati sa svog transakcijskog računa stranke na tekuće račune stipendista, a ne gotovinski kako je iskazala u finansijskom izvještaju, koji je Podnijela Centralnoj izbornoj komisiji BiH.

- (3) Evidencije o prometu blagajne, odnosno evidencije gotovinskih transakcija Glavnog odbora Građanske demokratske stranke BiH u iznosu od 39.500,00 KM, sačinjene su na osnovu nepotpune i neažurne dokumentacije.

- Glavni odbor stranke je u blagajničkim izvještajima (dnevniku blagajne i nalogima blagajni da naplati) evidentirao gotovinske primitke po osnovu priloga jedanaest fizičkih lica u ukupnom iznosu od 20.120,00 KM i primitke u iznosu od 19.380,00 KM za koje stranka navodi da su povrat dijela kredita od strane dva fizička lica.

⁶ Zakon o porezu na dohodak ("Službene novine Federacije BiH", br. 10/08, 9/10 i 44/11) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11 i 20/2012)

⁷ Ukoliko se stipendije ne isplaćuju u skladu sa odredbom iz člana 6. stav (1) tačka 7) Zakona o porezu na dohodak, iste se smatraju ličnim primanjima i podliježu oporezivanju u skladu sa pomenutim Zakonom.

Kontrolom blagajničke dokumentacije, utvrđeno je da Građanska demokratska stranka BiH nije izdavala potvrde ili bilo koji dokument licima koja su na blagajni gotovinski uplatila sredstva političkoj stranci, bilo kao donatori⁸ ili dužnici koji joj vraćaju zajam⁹, bez obzira što pojedinačne transakcije iznose i do 4.000,00 KM. Također, politička stranka ne posjeduje ni bilo koji drugi dokument potpisan od strane fizičkih lica koja su izvršila uplate sredstava.

- Pored uočenih propusta, koje je politička stranka napravila, tako što nije obezbijedila dokumente potpisane od strane lica koja su stranci uplatila sredstva, utvrđeno je da isplate koje su navedene kao povrati zajma, ne odgovaraju odredbama iz ugovora.

Građanska demokratska stranka BiH, zastupana po direktoru stranke, je 23.11.2005. godine zaključila Ugovor, broj: 01-144/05 sa fizičkom osobom, uposlenicom stranke, kojom joj je odobren beskamatni dugoročni namjenski zajam u novcu, za rješavanje stambenog pitanja. Zajam je odobren u iznosu 20.000,00 KM, sa rokom otplate od 16 godina, putem 192 mjesečne rate, po 104,00 KM. Pored navedenih uslova, politička stranka je korisnici kredita odobrila i grace period (period u kome ne postoji obaveza otplate zajma) u trajanju od pet godina.

Politička stranka, zastupana po predsjedniku stranke, je 10.04.2006. godine zaključila Ugovor, broj: 01-142/05 sa direktorom stranke, kojim mu je odobren beskamatni dugoročni namjenski zajam u novcu, za rješavanje stambenog pitanja. Zajam je odobren u iznosu 80.000,00 KM, sa rokom otplate od 20 godina, putem 240 mjesečnih rata, koje u skladu sa uslovima iz ugovora, obzirom da je kredit beskamatni, iznose po 333,33 KM. Pored navedenih uslova, politička stranka je korisniku zajma odobrila i grace period u trajanju od četiri godine.

Kroz blagajničku evidenciju stranke u 2011. godini, evidentirane su otplate zajma od strane, direktora Građanske demokratske stranke BiH i istovremeno osobe ovlaštene za podnošenje finansijskih izvještaja, u iznosu 10.880,00 KM i to: 3.000,00 KM 03. februara, 2.350,00 KM 08. aprila, 2.530,00 KM 12. avgusta i 3.000,00 KM 02. decembra 2011. godine.

Otplate zajma od strane uposlenice Građanske demokratske stranke BiH, koja obavlja poslove tehničkog sekretara, evidentirane su kao gotovinske uplate u blagajnu stranke u iznosu od 8.500,00 KM i to: 3.000,00 KM 02. februara, 1.500,00 KM 30. marta i 4.000,00 KM 09. decembra 2011. godine.

- Revizijom poslovnih knjiga, odnosno glavne knjige političke stranke, utvrđeno je da je datum unošenja u poslovne knjige, svih otplata zajma od strane dva prethodno navedena lica, dan 31.12.2011. godine, bez obzira što je naplata sredstava po tom osnovu vršena tokom godine, u periodu od februara do decembra 2011. godine.

Također je utvrđeno da je politička stranka, iz nerazjašnjenih razloga, iz poslovnih knjiga vršila isknjižavanje potraživanja po osnovu datih zajmova, u ukupnom iznosu od 96.000,00 KM, te ih ponovo uknjižavala i to sve sa datumom 31.12.2011. godine, kada je evidentirala i njihovu djelimičnu otplatu tokom godine.

Također, bitno je istaći i činjenicu da je Građanska demokratska stranka BiH 2006. godine, zajam u iznosu od 80.000,00 KM koji je isplatila direktoru stranke, u finansijskom izvještaju

⁸ U skladu sa odredbom iz člana 6. stav (1) Zakona o finansiranju, politička stranka je dužna izdati potvrdu fizičkom i pravnom licu od kojeg je primila prilog.

⁹ U skladu sa pozitivnim zakonskim propisima i aktuelnom praksom, uobičajeno je da svaka primo-predaja bilo u novcu ili stvarima bude verifikovana potvrdom, zapisnikom ili drugim obostrano potpisanim aktom, kojim se potvrđuje da je transakcija obavljena i ista se daje svim stranama koje učestvuju u primo-predaji.

koji je podnijela Centralnoj izbornoj komisiji BiH, iskazala kao trošak političke stranke na obrascu 4-1 izvještaja (Režijsko-administrativni i ostali troškovi političke stranke)¹⁰.

- (4) Građanska demokratska stranka BiH u finansijskom izvještaju, koji je dostavila Centralnoj izbornoj komisiji BiH, nije iskazala stvarno stanje svojih obaveza na dan 31.12.2011. godine, čime je prekršila odredbe člana 23. Pravilnika o godišnjim finansijskim izvještajima političkih stranaka.
- U finansijskom izvještaju stranka je iskazala obaveze prema tri javna preduzeća u iznosu od 22.977,22 KM i to: prema JP Sarajevogas d.o.o. Sarajevo u iznosu od 17.839,24 KM, obavezu prema JP Elektroprivreda BiH d.d. Sarajevo u iznosu od 3.677,20 KM i JP Vodovod i Kanalizacija d.o.o. Sarajevo u iznosu od 1.460,78 KM.
Na zahtjev Centralne izborne komisije BiH, JP Elektroprivreda BiH d.d. Sarajevo¹¹ i JP Vodovod i Kanalizacija d.o.o. Sarajevo¹² su dali odgovore da u njihovim bazama podataka Građanska demokratska stranka BiH nije registrovana kao kupac niti korisnik usluga, već je registrovana Služba za zajedničke poslove organa i tijela Federacije BiH, i njoj se fakturišu troškovi političke stranke.
Također, na zahtjev Centralne izborne komisije BiH, podatke o dugovanjima Građanske demokratske stranke BiH je dostavila i Služba za zajedničke poslove organa i tijela Federacije BiH, u kojima navodi da je dug političke stranke prema ovoj instituciji na dan 31.12.2011. godine iznosio 58.058,44 KM i to: dug za utrošenu vodu 12.863,93 KM, dug za plinsko grijanje 29.163,04 KM i dug za utrošenu električnu energiju 16.061,47 KM.
 - Politička stranka je u finansijskom izvještaju iskazala obaveze prema KJKP Rad d.o.o. Sarajevo u iznosu od 5.549,32 KM. Prema podacima ovog preduzeća¹³, dug Građanske demokratske stranke BiH na dan 31.12.2011. godine je iznosio 9.970,37 KM.

5.2. PREPORUKE

Preporučuje se Građanskoj demokratskoj stranci BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da se ne finansira iz izvora koji su političkim strankama zabranjeni Zakonom o finansiranju političkih stranaka,***
- ***da u skladu sa odredbama Zakona o finansiranju političkih stranaka uspostavi potpune i tačne evidencije o svojim prihodima i rashodima, obavezama i potraživanjima političke stranke, te da finansijske izvještaje podnosi u formi koju je odobrila Centralna izborna komisija BiH,***
- ***da uspostavi kontrolu nad ispravnošću dokumentacije, na osnovu koje evidentira naplaćena potraživanja po datim zajmovima,***

¹⁰ Nalaz revizije naveden u Izvještaju o pregledu godišnjeg finansijskog izvještaja za 2006. godinu Građanske demokratske stranke BiH broj: 09-07-6-1207/07 od 03.04. 2008. godine

¹¹ Akt broj: 03-4-3442-43765/2012 od 03.07.2012. godine

¹² Akt broj: 236/2012 od 09.07.2012. godine

¹³ KJKP Rad d.o.o. Sarajevo podatke o dugovanjima GDS BiH dostavilo aktom broj 8124/12 od 04.07.2012. godine

- *da poštuje i druge propise, prevashodno računovodstvene, po osnovu kojih politička stranka ima obavezu da evidentira stvarne poslovne događaje i to u momentu njihovog nastanka,*
- *da poštuje i porezne propise, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju i*
- *da finansijske izvještaje podnosi Centralnoj izbornoj komisiji Bosne i Hercegovine u skladu sa odredbama člana 11. stav (3) Zakona, odnosno u formi propisanoj Pravilnikom o godišnjim finansijskim izvještajima političkih stranaka.*

KOMENTAR:

Građanska demokratska stranka BiH se u datom roku nije očitovala na nalaze revizije navedene u Preliminarnom izvještaju o reviziji godišnjeg finansijskog izvještaja za 2011. godinu, koji je stranci dostavljen dana 08.02.2013. godine.

Zahvaljujemo se ovlaštenoj osobi za finansijske izvještaje Građanske demokratske stranke BiH, na dobroj i korektnoj saradnji tokom obavljanja revizije finansijskih izvještaja.

Mr.sc. Hasida Gušić, Šef Službe za reviziju – revizor

Nevenko Andan, revizor